

蘭封縣志

阜陽楊宗津題

卷十一 壺型

嚴封縣志卷之十一

壺型志

賢母

孝婦

貞節

烈行

歷來郡邑志乘婦女但載節烈其他懿行不概見是必處變乃傳履常則有美弗錄非所以廣勵閨門激揚風化也陶母曲成其子鮑妻善事其姑自昔推女宗焉爰采母賢婦孝以寇壺型之首而冰霜之操金石不渝無論已未旌表並著於編以敦風教志壺型

賢母

明

張汝翼邑增生妻李氏夫卒氏年二十歲矢志守節孝養翁姑皆氏紡績所供撫育四子勵志讀書皆成名長尙恆嘉靖戊午舉人次尙益次尙隨庠生次尙賁貢生縣學申請褒獎巡撫卞給匾曰節孝貞慈巡按卞給匾曰萼錄

修齡祀節孝

謝天恩妻孔氏夫歿氏年二十一歲孀居矢志經年不出閨闔家貧織紉謀生辛勤育子遺孤夢顯克承母教於嘉靖庚子登賢書授山東武城縣氏卒年六十六歲有司奉詔以表母儀祀節孝

王卯妻戴氏年二十喪夫撫育孤子命召有成名列庠序氏年七十二歲終萬歷間知縣張邦俊旌曰貞節可風

張蘭壽妻杜氏蘭壽病故氏年二十六歲遺孤贊二歲始孩氏辛勤教子成名有聲饗序

馬之起妻王氏妾薛氏之起謝世王氏二十五歲薛氏二十二歲同心守節撫孤嵩年弱冠補弟子員孫胤順治己亥成進士

馬國祥妻楊氏年十四歸于祥祥夭氏年二十歲孤子鑲甫一齡氏大義自持誓不二志越六年祥弟國禧相繼歿妻刁氏年二十五歲孤子錄方數

月妯娌共勵冰霜事老撫幼二子俱克成立並列膠庠舅姑先後謝世二氏拮据成禮順治四年知縣白國樑表其閭曰一門雙節

徐翼聖妻張氏二十而寡孤子師毅甫在襁褓舅姑年高氏奉事惟謹教子成章嚴慈並濟弱冠補弟子員氏卒年七十署縣鍾公表曰蒼筠矢志

皇清

田榮妻張氏于歸三載夫亡抱痛欲絕撫孤兒既臧以慈母兼嚴父弱冠遊庠氏年七十而卒康熙元年知縣門四闢額其閭曰茹蘖丸熊

孔毓芳妻馬氏爲同邑諸生于蕃室女年十八于歸奉事翁姑惟謹越十載毓芳病故氏年二十八歲一子傳符方穉父于蕃以大義曉之曰女子從一而終義也有子弗守以死殉夫則亦非義之正汝當善撫爾子以延夫祀氏守志終身克勤克儉遺孤傳符於雍正己酉選貢孫繼曾補開封府學廩生繼翦領乾隆戊午鄉薦皆馬氏之教也氏卒年七十一邑令袁公珂給匾曰

節孝垂芳

馮澗邑諸生妻張氏澗亡氏年二十有七矢志守貞藐孤四人思惕思懼思愉思悱俱在孩穉澗父瑋以明進士出宰德清遭變歸里宦囊蕭索氏娛老撫孤艱辛備歷督四子向學思惕思愉先後遊庠氏并憐姪婦孀居從孫失怙畢力栽培之卒年七十七歲於雍正三年邑令袁公郡守談公並錫匾額以表其閭

湯繼禹邑監生妻尙氏年二十六歲夫亡藐孤式九甫生八月撫育備歷艱辛崇禎壬午流寇擾害氏奉高氏劉氏兩孀姑避難河朔賊平旋里故業蕩然氏勤絀織以佐甘旨訓孤兒學成入泮卒年六十七歲於雍正三年具題建坊祀節孝

齊國玖考授經歷妻傅氏年二十八而寡撫育遺孤居酉堅貞自矢躬親績紡課兒句讀居酉弱冠遊庠於雍正丙午科附薦賢書氏壽登九秩膝繞曾

元雍正八年邑令梅枚表其門曰鶴齡鳳采

秦繼曾妻孔氏夫故氏年二十歲遺孤益遜甫在孩抱氏躬勤組織課子嚴慈兼濟益遜早歲入庠食餼克振家聲氏壽踰七十乾隆元年闔學公舉學院張考錫額曰井水矢清

郭隍妻王氏爲新安縣訓導世治室女年十八于歸越五載夫故無子以夫兄次子方廣爲嗣翁歿姑衰氏扶掖起居不離朝夕督子向學弱冠補弟子員氏壽踰八十乾隆二年學院張考錫額曰冰心維則

盧殿臣妻湯氏年十九于歸結褵三載夫亡有遺腹彌月產男氏恪守從一之志辛勤撫育孤子盧元克承母訓爲國學生卒年六十六歲於乾隆二年具題建坊

尙訥妻劉氏年十七歸於尙越四載夫亡遺兩藐孤呱呱泣在抱氏仰事老親俯育穉子躬操機杼課以詩書長濂源入邑庠次淵源附郡學乾隆二年學

院張考表其門曰金閨砥柱

胡毓璉繼妻侯氏適璉一載璉卒氏年二十一歲無所出元配遺有二子長銓次志賢甫在孩幼氏長養教誨均克有成先後入泮氏壽踰六十而終

孔毓倫妻聶氏年十九于歸結褵五載毓倫病故乏嗣氏承翁姑命以夫嫡姪傳寧爲繼子時方歲週撫養成立傳寧克承慈訓弱冠遊庠氏卒年六十四歲

寧德俊妻李氏夫故氏年二十歲幾不欲生念有遺腹緩死彌月產男甯露氏奉事舅姑教育孤子甯露弱冠入庠氏卒年五十一歲於乾隆十年請旌建坊

趙亨妻徐氏年十九于歸結褵五載亨以疾卒氏年二十四歲一子冠英甫在孩抱翁姑時已垂老氏以一身奉養高年撫育穉齒冠英早歲入泮食餼氏年已六十乾隆十六年闔學公舉學院夢麟錫額栢舟高範

馬恤中妻左氏年十七于歸結褵十載恤中病故遺有二子長曰上達次曰上義翁姑在堂家業蕭條氏以紡織供饒饌凡二子束金皆出其中焉上達早年入庠氏卒年八十三歲守節五十七年學院張公考題其門曰懿德昌後

張士麒邑監生妻張氏夫亡氏年二十三歲孤子純智甫一歲士麒善事父母素以孝著氏亦善事翁姑以成夫志辛勤課子入國學以能文稱氏卒年七十八歲乾隆十七年總督河院稽曾筠旌其門曰勁節凌霜

劉祥來妻管氏年十七歸劉越五載生子振鐸甫一歲祥來卒氏年二十二矢志守貞孝養翁姑曲盡婦道撫育幼子延師訓習詩書俾振鐸早年入庠守節三十年卒年五十二歲

戴高妻王氏夫故氏年二十七歲長子克勤三齡次男興賢遺腹逾五月而牛氏念姑已早亡翁衰子幼境况多艱代夫仰事俯育貧不自給資以女紅



翁以天年終喪具靡不周到訓子興賢讀書入泮守節三十五年現年六十二歲

程寅妻丁氏年十七歸程甫及二載程寅病故遺子執中僅二十餘日翁姑在堂俱係暮年氏奉事二人以媳代子教育藐孤以慈濟嚴迫翁姑辭世盡禮盡制而執中成立策名太學守節五十八年享年七十五歲閤學公舉節孝學院蔡公新旌其門曰淑德貞操

戴隣川妻高氏年十八歸戴甫三載隣川即以時疾卒維時上有翁姑下無子女氏欲以身殉有翁禮諭示以大宗不可絕嗣繼嗣必有承領氏乃吞聲忍泣抑志守節後以夫弟庠生濬川長子良貴生方彌月即爲過繼氏愛之不啻已出撫育成立今爲國學生諸孫林立爲長門衍一脉之傳現年六十七歲守節四十六年

父母有子必教之然父在則母或偏於慈父沒則兼有嚴君之責焉惟母氏

足不踰戶外邪僻之誘比匪之傷防閑或有弗逮其不率教者多矣若夫撫孤子以成立秉母訓以淑身人徒見其後日之顯揚嘖嘖稱羨而不知鞠育於茹荼飲藥之中提訓於風雨冰霜之際者人不能見也母賢而子克承之豈獨一家之慶云爾哉茲於邑中賢母彙集一編用彰壹教

孝婦

明

陳玉妻吉氏玉死玉父子乾年老吉氏操井臼供炊爨惟謹翁患傷寒親侍湯藥病劇割股以進病遂愈

魏讓妻樊氏素嫻婦道侍養老姑周旋寢食無不曲體能博歡心及姑抱病瀕危氏祈天割股調羹以進姑病立起邑人咸高其行聞於有司特表其閭曰不愧女宗

李進知妻朱氏夫故氏年二十歲冰兢自矢敬奉翁姑二老相依爲命翁八

十四歲姑八十一歲同年謝世氏力營殯葬相繼而終

劉恕妻段氏恕歿氏年二十六歲翁姑相視而泣以氏未有兒息恐懷異志氏撫臆盟心願相依終老家貧手針紉以養翁姑生事死葬敬謹有加成化二十三年奉詔建坊曰節孝祀節孝

孔尙寶妻黃氏年二十夫亡有女始孩甘心終節事姑左氏夫遺有墳地三畝氏力耕以奉其姑姑得頗養終身姑歿氏亦垂白後以天年終

岳萃英妻李氏侍御李敏孫女十九歲夫亡遺腹得男撫孤矢節歷六十五年卒萬歷間歲荒氏鬻簪珥奉養舅姑及相繼謝世喪葬盡禮萬歷四十二年邑令劉廷宣獎之曰共姜比美後孫岳進善曾孫岳雅皆補弟子員

高登選妻左氏登選家貧舌耕養母饋穀不繼氏勤紡織助之克孝其姑進膳侍寢晨昏弗懈姑櫻疾篤氏割股救姑病賴以安天啓二年知縣李長春給穀獎之并表其閭

劉尙孔妻李氏善事其姑孔氏孔氏衰年多病每思烹鮮李手針紉以佐甘旨怡然色養一朝姑病沉篤氏割股療之病漸愈見其股上刀瘢驚問倍加矜憫鄉里稱爲孝婦

侯之翰母王氏之翰父早世祖母崔氏衰邁與媳王氏相依爲命崔氏病劇王氏焚香告天願以身代潛自割股以奉姑病立愈崇禎三年知縣黎玉出表其門曰格天壽姑

皇清

戴先覺邑貢生妻劉氏先覺家貧母老出外教授生徒劉氏克孝其姑親執炊爨以供饗殯姑病醫藥罔效幾不能起氏割股以進病遂瘳順治十四年邑宰崔維雅書額獎勵

馮孜惺邑庠生妻趙氏年十六歸於馮踰年夫故未有兒息氏孝事翁姑婦代子職每事先意承志使翁姑不知有暮景之愁氏亦苦忘嫠居之苦迨翁

姑相繼謝世氏營喪葬盡禮盡哀宗黨稱善完節四十年卒年六十六歲

張時中妻王氏年十九嬪於張家貧時中父斌爲武孝廉母越氏素孱弱氏敬事翁姑每食必請所欲雖疏食必精必潔姑年七十臥病累月醫治不痊王氏禱天割股爲麵食以進姑病輒愈壽至八旬人咸謂孝思所感

管培業邑庠生妻孔氏年十九于歸奉養其姑馮氏朝夕不懈馮氏年逾六旬抱病床第孔氏親侍湯藥不離左右病勢日沉孔氏終夜傍徨焚香默祝割股雜肉勸膳馮氏食之病痊增壽六載鄉里稱其賢孝

馮思悌邑監生妻孔氏年十九于歸念孀姑張氏垂老一切家務服勤罔倦不貽姑憂姑患癱症手足痿痺幾不復起孔氏割股佐食勿令姑覺痼疾頓瘳後壽踰七十孔氏有子孝誠素遵慈訓弱冠遊庠食餼共稱賢孝之報

徐允珩妻李氏夫故孀居事翁姑至孝其翁徐定國患病傷寒氏百計莫救翁思食肉家甚貧且鄉居不可猝得氏遂割股以進翁食之病愈及翁問肉

劉朋邑堽陽集人妻王氏事其繼姑婁氏克盡婦道婁氏悅其婦並及其兒

釀成一門慈孝乾隆七年姑病臥床褥垂危王氏割股以進姑病輒愈咸稱孝感所致事載中州彰善錄

張元禮妻王氏結縭五載夫亡無子氏年二十三歲翁康熙己卯副榜張雲霞年逾六旬姑復患癱不起氏事翁姑終身勿懈姑病侍櫛沐調湯藥不離左右雍正年間翁姑相繼謝世家貧經營葬具百苦千辛卒勸大事邑人稱婦之賢僉謂張氏無子而有子

劉聘良妻孔氏年十八于歸越十載夫亡無嗣遺兩女孩氏曰有子則守無子則死婦道也但老姑在堂年近七旬養生送死繫誰之責因撫弱女朝夕織紡以供高堂之養姑歿盡哀盡禮葬則親駕靈輜道旁觀者無不悽愴洒淚孀居四十載卒年六十八歲

張承統邑監生繼妻趙氏克敦節孝承統元配孔氏育子則朱已出嗣氏夫亡無子矢志守貞敬奉其姑侯氏服勤弗懈乾隆十四年侯氏病劇趙氏割股療姑姑病輒愈

郭世珍妻劉氏十八于歸越次年世珍亡氏以身殉者數舅姑慰勉至再取夫弟子撫謙爲嗣氏遂留心撫育家貧日以紡績爲生奉事舅姑惟謹適舅疾篤乞天願代旋割股包麵食以進舅病遂愈氏現年五十五歲守節三十八年

婦人之孝事舅姑猶男子之孝事父母非以夫之存歿異也然當伉儷相偕庭闈並侍刑于之化歸美其夫孟子所稱導其妻子使養其老是也至於人稱未亡親年垂老家貧如洗宗黨無依煢煢婦能供菽水於生前謀窶窶於身後將所謂養生送死婦代子職者非與志中所收孝婦多屬孀閨蓋孀而能孝爲更難也用以厚人倫勵婦道雖割股醫親久在例禁然以愚孝之

一不敢掩沒云爾

貞節

唐

賈直言妻董氏名德直直言坐事貶嶺南以妻少乃訣曰生死不可期吾去可亟嫁無須也董不答引繩束髮封以帛使直封署曰非君手不解直言貶二十年乃還署帛宛然及湯沐髮墮無餘

明

段整妻魏氏夫歿氏年二十三歲翁姑時皆垂白三子甫在襁褓氏以織紉營生老幼咸資其養後長子安已授室而殤寡媳胡氏年十九亦以死自誓苦節三十餘年成化四年奉詔表其門曰雙節祀節孝

李嵩妻于氏都憲敏之冢婦也嵩早逝遺孤甫三月氏孀居四十三年隣人不識其面撫其子成立出仕成化五年奉詔表其閭曰完貞祀節孝



侯端妻王氏夫歿氏青年矢志服闋終身不施膏沐不御綺羅孀居四十年壽踰六十撫孤成立嘉靖二十一年奉詔建坊曰貞節祀節孝

秦儀妻陳氏儀病故無子十一年二十矢志完貞卒年七十二歲苦節五十二年侯名環妻李氏夫歿年十九投繯以殉姑救解以告翁翁曰爾死完爾之事爾子始孩失乳必死死則侯氏無後矣涕泣勸諭氏悟乃敬事翁姑鞠育孤子邑令錫額曰節並柏舟卒年六十八歲

張鳳苞邑廩生妾劉氏苞故氏年二十與其嫡溫氏俱無子有女六人越二年溫亦相繼卒劉矢志靡他遺嫁六女主持家計年七十以病終無子守節且以側室與嫡並守節嫡死又獨守節是皆爲其難者鄉黨重之

王徵祥妻侯氏肅敏公孫婦也祥死誓以身殉衆相勸諭以藐孤在抱乃辛勤育子克延後嗣終其身足跡不踰閭閻壽七十二而卒有司褒之曰栢操松齡